



Männerdiskriminatioun (7/11/2006)



Commentaire:
Danièle Weber, RTL Radio Lëtzebuerg

Et kéinten engem bal Tréine kommen, wann een dem Fernand Karthäiser vun der Association des Hommes du Luxembourg - kuerz AHL - am Telesreportage nokuckt, wéi heen iwwert d'Diskriminatioun vu Männer zu Lëtzebuerg verzielt. Männer wäeren oft ennerleeën - och wa se méi staark sinn - hee wéisst vun engem Fall, wou ee Mann vu senger Fra geschloe gouf, während

hee geschlof huet.

Een, deen do net wakreg gött, a sech wiert, deem ass vläicht wierklech net gutt ze hëllefen. D'Associatioun vun de Lëtzebuenger Männer huet natierlech nach ganz aner Beispiller vu brutaler Männerdiskriminatioun op Lager. Virun allem vu gescheedte Männer - mee och soss. D'Situatioun wär am gaang ze kippen, heescht et - an dat zu Ongonschte vun de Männer.

Allerdéngs gött och op anere Plazen en ähnleche Langage geschwat - zum Beispill op der Präsentatioun vum éischte Weltmännerdag zu Lëtzebuerg. Do wousst d'Chancegläichheitsministesch vun engem Hausmann, ze zielen, dee mat senger Kanner an d'Crèche oder op d'Spillplaz geet, an do vun de Frae guer net bekuckt oder ugeschwat gött. Oder de Fall vun engem Papp, dee säi Puppelchen huet missen op enger Dammentollette frëschmaachen, wëll op der Härentollette kee Wéckeldesch war.

Weem bei esou schroe Beispiller vu Männerdiskriminierung d'Tréine kommen, dee sollt sech am beschten ee ganze Pak Nueschnappescher prett halen, wann e sech déi aner Säit ukuckt. Den Statistiken no ass nämlech glat näischt ëmgekipp - et huet mol nach net net ugefaang sech ze beweegen. Manner an der Pei, manner Chance Chef ze ginn oder soss d'Leeder eropzeklappen, iwwerhaupt manner Chancen, eng Aarbechtplaz ze kréien, vill méi staark vertraude bei den RMGisten a bei den Allengerzéier - datt d'Realitéit fir Fraen hei am Land nach ëmmer esou an net aanescht ausgesäit, ass kee Geheimnis.

Mee dars si mer vläit e bësse midd - well dat ass jo schonn - trotz all deenen hallefhärzesche Measure fir Fraen ze pushen - zënter Joeren esou.

Also entdecke mer elo eis Männer emol ganz anescht - an dat mécht eben och d'Chancegläicheitsministesch. Schliisslech muss een - souguer wa se do an der Minoritéit sinn - och un déi männlech Wieler denken. D'Marie-Josée Jacobs gött net midd, drop hinweisen, datt net nëmme Fraen, mee och Männer doheem geschloe ginn. Zeng Prozent vun den Affer sinn effektiv Männer - a si wär iwwerzeecht, datt d'Donkelziffer vun de geschloene Männer nach vill méi héich ass, sou d'Ministesch. Esou enger Analyse aus dem Bauch eraus kéint een natierlech entgéint sëtzen, datt d'Donkelziffer bei den Frae méiglerchweis genee esou héich ass. Oder et kéint een drop pochen, datt ëmmerhin 90 Prozent vun deenen, déi schloen, Männer sinn.

Oder awer - et kéint een - dann allerdéngs op engem manner populisteschen Niveau - iwwert d'Ursaache vu Gewalt diskutieren.

Dat selwescht beim Scheedungsrecht. Amplaz ze kräischen, kéint ee konstruktiv Propose maachen. Wéi vill Pappen, déi no enger Reform méi Rechter kruten, wierklech schaarf drop sinn, sech méi ëm hier Kanner ze këmmen, gesi mer dann. En attendant kéint d'Ministesch mol aner Zuelen an d'Diskussioun bréngen - zum Beispill wéivill Frae sech am Ablack, ouni vill Ennerstëtzung aleng mat hier Kanner

duerschloe mussen - mee dat wär, wéi gesot, eng Diskussioun op engem aneren Niveau.